

Na osnovu člana 7. stav 2. Zakona o budžetima u Federaciji BiH ("Službene novine Federacije BiH", broj: 102/13, 9/14, 13/14, 8/15, 91/15, 102/15, 104/16, 5/18, 11/19, 99/19 i 25a/22) i člana 70. stav 1. tačka 2. Statuta Općine Vogošća ("Službene novine Kantona Sarajevo", broj: 27/14 - Prečišćeni tekst i 14/15 i 9/20), Općinsko vijeće Vogošća, na sjednici održanoj 28.12.2023. godine, donijelo je

## **O D L U K U** **O IZVRŠAVANJU BUDŽETA OPĆINE VOGOŠĆA** **ZA 2024. GODINU**

### **I - OPĆE ODREDBE**

#### **Član 1.**

Ovom odlukom utvrđuje se forma i struktura prihoda i primitaka, rashoda i izdataka Budžeta Općine Vogošća za 2024. godinu (u daljem tekstu: Budžeta), način njegovog izvršavanja, upravljanje prihodima i primicima i rashodima i izdacima Budžeta, prioritet plaćanja, finansijsko izvještavanje, ovlaštenja Općinskog načelnika, te prava i obaveze korisnika budžetskih sredstava u izvršavanju Budžeta i druga pitanja vezana za izvršavanje Budžeta za tekuću godinu.

### **II - STRUKTURA BUDŽETA**

#### **Član 2.**

Budžet se sastoji od općeg, posebnog i funkcionalnog dijela.

Opći dio Budžeta se sastoji od bilansa prihoda i primitaka, te rashoda, izdataka i finansiranja.

U računu prihoda i primitaka iskazuju se porezni i neporezni prihodi, kao i drugi prihodi i primici i neutrošeni prihodi budžeta iz 2023. godine, razvrstani po ekonomskoj i fondovskoj klasifikaciji.

Posebni dio Budžeta sadrži detaljan raspored rashoda i izdataka budžetskih korisnika, raspoređenih u tekuće i kapitalne izdatke za tekuću budžetsku godinu, razvrstane po ekonomskoj i fondovskoj klasifikaciji.

Funkcionalni dio budžeta sadrži raspored rashoda i izdataka budžetskih korisnika, raspoređenih u tekuće i kapitalne izdatke za tekuću budžetsku godinu razvrstane po funkcionalnoj klasifikaciji.

Budžet mora biti uravnotežen tako da ukupni prihodi i primici pokrivaju ukupne rashode i izdatke.

Prihodi i primici se priznaju u periodu kada su mjerljivi i raspoloživi, tj. kada su uplaćeni na račun Budžeta, a rashodi i izdaci se priznaju u periodu kada je obaveza nastala.

Općina kao jedinica lokalne samouprave je jedan budžetski korisnik (u daljem tekstu budžetski korisnik) u skladu sa Registrom budžetskih korisnika Općine Vogošća za 2024. godinu («Službene novine Kantona Sarajevo», broj: 24/23).

Općinsko vijeće, Pravobranilaštvo, službe za upravu i stručne službe su potrošačke jedinice koje imaju finansijske planove izdataka, i iskazuju se pojedinačno u posebnom dijelu Budžeta Općine.

### **III - IZVRŠAVANJE BUDŽETA**

#### **Član 3.**

Budžetom se osiguravaju sredstva za funkcionisanje Jedinog općinskog organa uprave, te sredstva za tekuće i kapitalne grantove i kapitalne izdatke.

Općinski načelnik u skladu sa propisima raspolaže i izvršava Budžet Općine u skladu sa dinamikom priliva sredstava, ovom Odlukom i važećim propisima.

Pomoćnici načelnika odgovorni su za potpunu i pravovremenu naplatu prihoda i primitaka i dužni su provesti sve zakonom propisane radnje u cilju naplate potraživanja iz svoje nadležnosti.

Općinski pravobranilac je dužan redovno izvještavati Općinskog načelnika i nadležnu službu o toku sudskog postupka i mogućem roku i ishodu istog. U slučaju da su potrebna eventualna

izdvajanja sredstava iz Budžeta po sudskoj presudi isti obavještava i podnosi zahtjev sa konkretnom instrukcijom Službi za budžet i finansije za plaćanje.

Općinski Načelnik raspolaže sredstvima Budžeta za namjene koje su određene Budžetom i do visine utvrđene u posebnom dijelu Budžeta, a u skladu sa ovom Odlukom.

Općinski Načelnik putem Službe za budžet i finansije vrši tekuću kontrolu zakonitosti utroška sredstava potrošačkih jedinica, kao korisnika sredstava, po visini i namjenama.

Svaki utrošak sredstava budžeta mora biti odobren od strane Načelnika Općine ili lica koje on ovlasti.

#### **Član 4.**

Budžet se izvršava u skladu sa njegovim likvidnim mogućnostima i po slijedećim prioritetima:

- a) Otplata duga i kamata,
- b) Obaveze po osnovu plaća, doprinosa i naknada uposlenim i vijećnicima,
- c) Obaveze po osnovu rashoda za materijal i usluge,
- d) Tekući transferi,
- e) Kapitalni transferi i kapitalni izdaci i
- f) Ostalo

U slučaju poremećene likvidnosti Budžeta, Općinski Načelnik, na prijedlog Službe za budžet i finansije poduzima mjere za uravnoteženje Budžeta i pristupa izmjeni i dopuni Budžeta.

#### **Član 5.**

Izuzetno, usljed neusklađenosti priliva sredstava u Budžetu ili nedovoljno predviđenih izdataka korisnika koji zahtijevaju prekoračenje planiranih stavki, Općinski Načelnik na prijedlog Službe za budžet i finansije uz prethodnu saglasnost korisnika sredstava, može donositi odluke ili zaključke o prestrukturiranju odnosno preraspodjeli rashoda u okviru ukupnog iznosa odobrenog za budžetskog korisnika, najviše do 10 % ukupno odobrenih rashoda za budžetskog korisnika. Obim i vrste rashoda za prestrukturiranje Općinski načelnik utvrđuje posebnom odlukom ili zaključkom koja postaje sastavni dio budžeta, i objavljuje se u Službenim novinama Kantona Sarajevo.

U okviru odobrenog Budžeta preraspodjela sredstava unutar budžetskog korisnika za iste kategorije (grupa rashoda) neograničeno je dozvoljena.

Općinski Načelnik je obavezan informisati Općinsko Vijeće o izvršenim preraspodjelama sredstava Budžeta u periodičnom i godišnjem izvještavanju o izvršenju Budžeta.

U svrhu obezbjeđenja funkcionalne održivosti Budžeta, za finansiranje tekućih izdataka u slučaju neusklađenosti priliva, tj. nedostatka sredstava u općem fondu, moguće je dio prihoda po osnovu zemljišne rente, naknada za zemljište i naknada za uređenje građevinskog zemljišta usmjeriti na rashode po osnovu bruto plaća i naknada troškova zaposlenih u Jedinstvenom općinskom organu, koji su neposredno angažovani na poslovima izgradnje, rekonstrukcije i sanacije objekata komunalne infrastrukture i društvenog standarda, srazmjerno njihovom angažmanu na pomenutim poslovima, a sredstva će se rasporediti shodno procentima kako slijedi:

- u Službi za urbanizam i prostorno planiranje, do 70 % rashoda za bruto plaće i naknade neposredno angažovanih uposlenika,
- u Službi za investicije i komunalne poslove, do 100 % rashoda za bruto plaće i naknade neposredno angažovanih uposlenika,
- u Službi za geodetske, imovinsko - pravne poslove i katastar nekretnina, do 50 % rashoda za bruto plaće i naknade neposredno angažovanih uposlenika,
- Inspektorat, do 60 % rashoda za bruto plaće i naknade neposredno angažovanih uposlenika,
- za Radni vod Općinskog štaba CZ do 90 % troškova naknada.

## **Član 6.**

Budžetski korisnik, odnosno potrošačke jedinice su dužni u izvršenju Budžeta uskladiti dinamiku realizacije obaveza po Budžetu sa dinamikom priliva i odliva sredstava.

Izuzetno, ako u toku budžetske godine, zbog nastanka novih obaveza, dođe do povećanja rashoda ili se smanje prihodi, može se donijeti odluka o obustavljanju izvršavanja pojedinih rashoda ili izdataka u trajanju od 45. dana. Odluku donosi Općinski Načelnik na prijedlog Službe za budžet i finansije.

Mjerama privremenog obustavljanja izvršenja Budžeta Općinski Načelnik može:

1. Zaustaviti preuzimanje obaveza,
2. Predložiti produženje ugovorenih rokova plaćanja i
3. Korigovati transfere za sve potrošačke jedinice za iznos procenta smanjenja tekućih prihoda u odnosu na plan Budžeta, a na osnovu kvartalnih izvještaja.

Ako se Budžet u tom roku ne može uravnotežiti, Općinski Načelnik predlaže Općinskom vijeću Izmjene i dopune Budžeta, najkasnije u roku od 15 dana prije isteka roka za privremenu obustavu izvršavanja Budžeta.

Budžet se mora uravnotežiti sniženjem predviđenih izdataka ili pronalaženjem novih prihoda.

Uravnoteženje Budžeta se provodi putem Izmjena i dopuna Budžeta, po postupku za donošenje Budžeta.

## **Član 7.**

Budžet može primati namjenske donacije, grantove i primitke koji se realizuju po utvrđenoj namjeni davaoca sredstava, a koji nisu planirani Budžetom ili su planirani u nedovoljnom iznosu (namjenski grantovi Kantona, Grada ili drugih nivoa vlasti kao i grantovi iz inostranstva). Ova neplanirana sredstva se, posebnom odlukom Općinskog Načelnika (odluka o povećanju prihoda i rasporedu rashoda) uključuju u Budžet i postaju sastavni dio Budžeta.

Neplanirana ili nedovoljno planirana sredstva (donacije, grantovi i primitci) u Budžetu, za koja je organ uprave potpisao sporazum, protokol o saradnji, zaključak i sl., a biće doznačena u korist budžeta po realizaciji projekta – namjene za koja je potpisan sporazum, protokol o saradnji, zaključak i sl., sa davaocem sredstava, se posebnom odlukom Općinskog Načelnika (odluka o povećanju prihoda i rasporedu rashoda) uključuju u Budžet i postaju sastavni dio Budžeta.

## **Član 8.**

Općinski načelnik, putem nadležnih službi, izvršava obaveze dinamikom mjesečnih planova po korisnicima i izdacima u skladu sa raspoloživim sredstvima.

Izdaci koji zahtijevaju prekoračenje pojedinih stavki u mjesečnom planu za izvršavanje Budžeta, mogu se podmiriti uz saglasnost Općinskog načelnika, iz sredstava godišnjeg plana za iste namjene.

## **Član 9.**

Postupak nabavke investicijskih dobara i usluga obavljat će se u skladu sa Zakonom o javnim nabavkama Bosne i Hercegovine.

## **IV - REALIZACIJA SREDSTAVA BUDŽETA**

### **Član 10.**

Sredstva utvrđena u Budžetu - ekonomski kod 611100 - bruto plaće zaposlenih, 611200 - naknade troškova zaposlenih i 612000 - doprinosi na teret poslodavca, isplaćivat će se u skladu sa Odlukom o plaćama i naknadama u Jedinstvenom općinskom organu uprave i Pravobranilaštvu Općine Vogošća, kao i ostalim materijalnim pravima zaposlenih po važećim propisima za državne

službenike i namještenike Organa Uprave u FBiH, Kolektivnim ugovorom, podzakonskim i internim aktima Općine.

Osnovica za obračun plaće utvrđuje se sporazumom između Općinskog načelnika i predstavnika Sindikata, a u skladu sa odredbama člana 5. stav 3. Zakona o plaćama i naknadama u organima vlasti Federacije BiH i projekcijom Budžeta za 2024. godinu i iznosi 385,00 KM, a bod za obračun plaće iznosi 1,10.

### **Član 11.**

Sredstva utvrđena u Budžetu - ekonomski kod 613000 - izdaci za materijal i usluge - raspoređuju se i isplaćuju po zahtjevu nadležnih službi po osnovu ovlaštenja Općinskog Načelnika, a u skladu sa članom 9. ove Odluke, prema budžetom utvrđenim namjenama. Naknade za putne troškove i dnevnice koje nastaju u vezi sa službenim putovanjima utvrđeni su Uredbom o naknadama troškova za službena putovanja.

- Naknade komisijama za tehnički pregled objekata isplaćivat će se na prijedlog nadležne Službe, a shodno Odluci o troškovima rada organa uprave Općine Vogošća u postupku izdavanja upotrebne dozvole ("Službene novine Kantona Sarajevo", broj: 35/15).
- Naknade vijećnicima - paušali, naknade vijećničkim komisijama i komisijama koje formira Općinski Načelnik, isplaćivat će se u visini i na način utvrđen aktima Općinskog Vijeća i Općinskog Načelnika, a na osnovu evidencija dostavljenih od strane nadležnih službi.
- Naknade članovima savjeta MZ isplaćivat će se kvartalno po prijedlogu i dostavljenoj evidenciji nadležne službe.
- Naknade povjerenicima (naknade za rad povjerenicima CZ koji su obavljali povjerene poslove) i naknade članovima Štaba CZ - isplaćivat će se na zahtjev i prema mjesečnom obračunu koji sastavlja pomoćnik Načelnika Službe za civilnu zaštitu, a u skladu sa zaključkom Općinskog Načelnika.

### **Član 12.**

Sredstva utvrđena u Budžetu - ekonomski kod 614100 - grantovi drugim nivoima vlasti - rasporedit će se na slijedeći način:

- Sufinansiranje uređenja i održavanja šehidskih mezarja, realizovaće se po zahtjevu Fonda Memorijala, a na prijedlog Službe za boračko invalidsku i socijalnu zaštitu,
- Grant za podršku rada Memorijalnog centra Srebrenica – Potočari, realizovaće se na osnovu Memoranduma o razumijevanju potpisanog između Memorijalnog centra Srebrenica – Potočari i Općine Vogošća, a na prijedlog Službe za boračko invalidsku i socijalnu zaštitu,
- Grant za podršku Fondaciji za pružanje pravne pomoći pripadnicima boračke populacije, realizovaće se po zahtjevu Fondacije, a na prijedlog Službe za boračko invalidsku i socijalnu zaštitu,
- Sufinansiranje izgradnje memorijalnog centra Žuč, realizovaće se na osnovu Sporazuma o nastavku aktivnosti realizacije Potprojekta Izgradnje memorijalnog centra "Žuč", potpisanog između Ministarstva za boračka pitanja, Fonda Memorijala, Zavoda za izgradnju KS i općina sa područja Kantona Sarajevo, a na prijedlog Službe za boračko invalidsku i socijalnu zaštitu,
- Transferi za izbore realizovaće se sukcesivno na osnovu finansijskog plana i zahtjeva Općinske izborne komisije, a u skladu sa Budžetom odobrenim sredstvima i uz saglasnost Općinskog Načelnika,
- Transfer za učešće u projektima razvoja turističke infrastrukture, realizovaće se na prijedlog Službe za privredu, integrisani lokalni razvoj i društvene djelatnosti,
- Transfer za učešće u projektima zaštite okoline, realizovaće se na prijedlog Službe za privredu, integrisani lokalni razvoj i društvene djelatnosti.

### **Član 13.**

Sredstva utvrđena u Budžetu - Grantovi pojedincima isplaćivat će se kako slijedi:

- Grantovi pojedincima po osnovu zdravstvene zaštite lica u stanju socijalne potrebe, grantovi porodiljama, penzionerima sa najnižom penzijom, sredstva za sufinansiranje rijetkih i teških bolesti, sredstva za pomoć oboljelim od celijakije, jednokratne pomoći i pomoći za liječenje, kao i drugi grantovi iz domena socijalne zaštite realizovaće se na prijedlog Službe za boračko invalidsku i socijalnu zaštitu, a u skladu sa Zakonom o zdravstvenom osiguranju, Zakonom o socijalnoj zaštiti, odlukama Općinskog vijeća i internim Pravilnicima.
- Stipendije za učenike i studente - realizovaće se na prijedlog nadležne Službe, na osnovu Odluke Općinskog vijeća i internog Pravilnika, a sufinansiranje poslovnih planova za razvoj poduzetništva i zapošljavanje mladih realizovat će se na prijedlog nadležne službe, na osnovu javnog poziva i u skladu sa predhodno utvrđenim internim Pravilnikom.
- Sredstva za interventno djelovanje iz oblasti stambene problematike - realizovat će se na prijedlog nadležne Službe, po zahtjevima korisnika, a na osnovu Pravilnika o kriterijima, postupku i dokumentaciji potrebnoj za ostvarivanje prava za dodjelu i ugradnju građevinskog materijala na ime pomoći vlasnicima oštećenih stambenih objekata na području općine Vogošća.
- Ostali grantovi pojedincima – povratnici i prihvat državljana BiH po osnovu Sporazuma o readmisiji – realizovaće se u skladu sa Sporazumom o saradnji na provođenju Pod-projekta BiH2 (2013) državnog projekta stambenog zbrinjavanja u okviru Regionalnog stambenog programa između Ministarstva za ljudska prava i izbjeglice BiH, Federalnog ministarstva raseljenih osoba i izbjeglica i Općine Vogošća i Sporazuma o readmisiji između BiH i Evropske zajednice i Protokola o postupanju nadležnih organa u prihvat, propratu i privremenom zbrinjavanju ranjivih readmisiranih osoba, a uz prijedlog Službe za boračko invalidsku i socijalnu zaštitu,
- Ostali grantovi pojedincima - izvršavat će se zaključkom Općinskog načelnika, a na osnovu zahtjeva korisnika, uz prijedlog nadležne Službe.
- Transferi za posebne namjene CZ – provođenje mjera zaštite i spašavanja će se isplaćivati u skladu sa Odlukom o uslovima i načinu korištenja sredstava ostvarenih po osnovu posebne naknade za zaštitu od prirodnih i drugih nesreća ("Službene novine Federacije BiH", broj: 4/12 i 80/13), a na osnovu finansijskog plana utroška sredstava posebne naknade usvojenog od strane Štaba CZ, odluka Štaba CZ i uz prijedlog nadležne Službe. Na isti način, isplaćivat će se i sredstva za nabavku posebnog materijala za potrebe civilne zaštite - ekonomski kod 613487 i nabavku specijalne opreme za opremanje jedinice CZ i Štaba CZ - ekonomski kod 821380, te ostale budžetske pozicije u skladu sa usvojenim finansijskim planom za tekuću godinu.
- Troškovi izrade stručnih nalaza o stanju objekata uništenih ili oštećenih aktiviranjem klizišta i mašinsko uklanjanje sa sortiranjem, isplaćivat će se na prijedlog nadležne Službe po ovlaštenju Općinskog načelnika. Navedena sredstva će se usmjeriti na angažovanje građevinske operative koja će izvršiti rušenje i uklanjanje sa sortiranjem iskoristivog materijala i hortikulturno uređenje zemljišta objekata za koje je utvrđeno da se više ne mogu bezbjedno koristiti,
- Grantovi djeci sa invaliditetom realizovat će se na osnovu rješenja uz prijedlog nadležne Službe, a u skladu sa Zakonom o osnovnom obrazovanju.

#### **Član 14.**

Sredstva utvrđena u Budžetu - Grantovi neprofitnim organizacijama - ekonomski kod 614300 isplaćivat će se kako slijedi:

- Grant za obrazovanje, realizovat će se na osnovu potpisanih sporazuma sa Ministarstvom odgoja i obrazovanja i sporazuma sa školama na području općine Vogošća, a nagrade učenicima koje se finansiraju iz ovog granta isplaćivat će se na osnovu internog Pravilnika o nagrađivanju učenika, a uz prijedlog nadležne službe.
- Grant za kulturu, realizovat će se na osnovu javnog poziva i prihvaćenih aplikacija nevladinih organizacija, a na osnovu potpisanih ugovora, dok će se jedan dio sredstava realizovati na

- osnovu potpisanih sporazuma o sufinansiranju projekata za koje korisnici nisu imali saznanja u toku raspisivanja javnog poziva, a uz prijedlog nadležne službe.
- Grant za podršku projektu ravnopravnosti polova i grantovi za mlade izvršavat će se za utvrđene namjene a veći dio sredstava će se realizovati po raspisanom javnom pozivu za projekte organizacija civilnog društva i potpisanim ugovorima, a uz prijedlog nadležne službe,
  - Grant za osnivanje, rad i materijalno opremanje Dobrovoljnog vatrogasnog društva i pomoć za održavanje Planinarskog doma izvršavat će se za utvrđene namjene, a na osnovu potpisanih sporazuma, uz prijedlog nadležnih službi.
  - Grant neprofitnim organizacijama po odluci Načelnika - realizovat će se zaključkom Općinskog načelnika, a na osnovu zahtjeva korisnika, uz prijedlog nadležne Službe,
  - Pomoć osobama u stanju socijalne potrebe kroz projekte nevladinih i humanitarnih organizacija realizovat će se na osnovu zahtjeva nevladinih organizacija koje pomažu socijalno ugroženo stanovništvo, a koje ne ispunjava kriterije propisane Odlukom o odobravanju i isplati jednokratne novčane pomoći licima u stanju socijalne potrebe.
  - Sufinansiranje posebnih projekata boračke populacije vršit će se na osnovu zahtjeva i potreba boračkih udruženja i pojedinaca za koje Općina ima interes, a koji nisu planirani projektima boračkih udruženja.
  - Grantovi parlamentarnim grupama (klubovima vijećnika) doznačavat će se u skladu sa važećom Odlukom o finansiranju rada Klubova vijećnika političkih stranaka i nezavisnih vijećnika u Općinskom vijeću Vogošća.
  - Grantovi boračkim udruženjima i civilnim žrtvama rata doznačavat će se na osnovu raspisanog javnog poziva, u skladu sa Pravilnikom o načinu ostvarivanja materijalne podrške i kriterija za sufinansiranje boračkih udruženja, udruženja civilnih žrtava rata, udruženja logoraša i udruženja nestalih osoba Općine Vogošća i donesenom Odlukom o raspodjeli finansijskih sredstava boračkim udruženjima iz Budžeta Općine Vogošća za 2024. godinu, te potpisanim ugovorima sa korisnicima, a na prijedlog nadležne Službe.
  - Udruženje "Haber" - spomen soba (sredstva za uređenje i rad spomen sobe), doznačavat će se po osnovu Sporazuma o saradnji zaključenog između Općine Vogošća i Udruženja za zaštitu historijskih vrijednosti "Haber", a na osnovu zahtjeva i uz prijedlog nadležne Službe.
  - Sredstva za rad i funkcionisanje Centra za zdravo starenje Vogošća realizovat će se na osnovu potpisanog Sporazuma ili Ugovora, a uz prijedlog nadležne Službe,
  - Grantovi sportskim organizacijama i grantovi ostalim organizacijama i udruženjima izvršavat će se kvartalno, odnosno polugodišnje ili po zahtjevu korisnika ili na osnovu Sporazuma. Raspodjela sredstava korisnicima će se vršiti na osnovu raspisanog javnog poziva (po pravilniku i LOD metodologiji), u skladu sa Pravilnikom o kriterijima i procedurama za sufinansiranje projekata organizacija civilnog društva i donesenom Odlukom o raspodjeli finansijskih sredstava udruženjima iz Budžeta Općine Vogošća za 2024. godinu, te potpisanim ugovorima sa korisnicima, a na prijedlog nadležne Službe.
  - Tekući grantovi OO Crveni križ - doznačavat će se u mjesečnim tranšama.

## **Član 15.**

Korisnici budžetskih sredstava (boračka udruženja, udruženja iz oblasti sporta i kulture i ostale organizacije i udruženja) dužni su, po okončanju projekata ili realizaciji odobrenih sredstava dostaviti nadležnoj službi izvještaj (narrativni i finansijski) o namjenskom utrošku sredstava sa odgovarajućom finansijskom dokumentacijom, a najkasnije do okončanja budžetske godine, što je preduslov za dalje finansiranje.

U slučaju nepoštivanja odredbi iz ovog člana, Općinski Načelnik može svojom Odlukom zaustaviti finansiranje korisniku budžetskih sredstava za tekuću godinu, odnosno isti ne mogu biti korisnici budžetskih sredstava za narednu godinu.

## **Član 16.**

Raspored sredstva utvrđenih u Budžetu - ekonomski kod 614400 - grantovi javnim preduzećima i ekonomski kod 614500 - grantovi privatnim preduzećima i poduzetnicima vršit će se na osnovu potpisanih sporazuma, ugovora ili faktura, konkretnih zahtjeva ili prijedloga nadležnih službi koje su odgovorne za realizaciju planiranih aktivnosti ili projekata u okvirima svojih nadležnosti, kao i odluka Općinskog Vijeća.

Sredstva predviđena na ekonomskom kodu 614411 – Grantovi JU “KSC” Vogošća i Grantovi RTV “Vogošća” transferišu se u principe mjesečno u visini 1/12 plana. U slučaju povećanja granta u toku budžetske godine, mjesečna tranša za mjesec u kome je izvršeno navedeno povećanje, isplatit će se u iznosu 1/12 plana uvećana za iznos za koji je pozicija uvećana.

Isplata sredstava vršit će se na zahtjev nadležnih službi.

## **Član 17.**

Povrat više ili pogrešno uplaćenih sredstava u Budžet prethodnih godina izvršit će se uplatiocima iz sredstava utvrđenih na ekonomskom kodu 614800 - ostali povrati i drugo, a na osnovu Pravilnika o procedurama za povrat i preknjižavanje više ili pogrešno uplaćenih javnih prihoda sa jedinstvenog računa trezora Općine Vogošća i donesenog rješenja.

Naknade za povrat ili uplate po rješenjima, sudskim presudama i nagodbama, isplaćuju se na osnovu pravomoćnih i izvršnih sudskih rješenja, a uz prijedlog Općinskog Pravobranilaštva.

## **Član 18.**

Sredstva utvrđena u Budžetu ekonomski kod 615100 - kapitalni grantovi drugim nivoima vlasti, ekonomski kod 615200 - kapitalni transferi pojedincima, ekonomski kod 615300 – kapitalni grantovi neprofitnim organizacijama i ekonomski kod 615400 – kapitalni grantovi javnim preduzećima rasporedit će se na osnovu ugovora ili sporazuma, utvrđenih programa rada i prioriteta, kao i konkretnih pojedinačnih zahtjeva, a na prijedlog nadležnih službi.

Sredstva namjenjena za finansiranje sanacije, rekonstrukcije i izgradnje komunalne infrastrukture (vodovodne i kanalizacione mreže, elektro mreže i javne rasvjete, gasifikacije područja općine, itd.), rasporedit će se shodno prioritetima kapitalnih ulaganja utvrđenim Programom prioriteta projekata u oblasti komunalne infrastrukture za 2024. godinu i Programom rada Općinskog načelnika usvojenim od Općinskog vijeća.

Službe nadležne za realizaciju planiranih kapitalnih grantova, odgovorne su za izradu ugovora sa korisnicima, odnosno, davaocima usluga, te praćenje namjenskog utroška sredstava.

Postupak realizacije ovih projekata vršit će se u skladu sa odredbama člana 9. ove Odluke.

## **Član 19.**

Sredstva utvrđena u Budžetu na ekonomskom kodu 821000 – kapitalni izdaci, realizuju se uz primjenu Zakona o javnim nabavkama, a postupak realizacije ovih projekata vršit će se u skladu sa odredbama člana 9. ove Odluke.

Sredstva utvrđena u budžetu 821100 – nabavka zemljišta realizuju se po odobrenju Općinskog načelnika, putem Službe za geodetsko, imovinsko pravne poslove i katastar nekretnina i Službe Civilne zaštite.

Sredstva utvrđena u budžetu – ekonomski kod – 821200, 821300, 821500 i 821600 – nabavka građevina, ostalih objekata, opreme, stalnih sredstava u obliku prava, rekonstrukcija i investiciono održavanje realizuju se po odobrenju Općinskog načelnika na osnovu potpisanih ugovora o nabavci radova, usluga i opreme putem nadležnih službi.

## **Član 20.**

Sredstva tekuće rezerve Budžeta, koriste se za podmirenje hitnih i nepredviđenih izdataka koji se pojave tokom budžetske godine.

O korištenju sredstava tekuće rezerve Budžeta odlučuje Općinski načelnik i o tome izvještava Općinsko vijeće, a odluke o utrošku tekuće rezerve se objavljuju u Službenim novinama Kantona Sarajevo.

#### **Član 21.**

Ako se tokom tekuće fiskalne godine na osnovu propisa proširi djelokrug ili nadležnost korisnika, osnuje novi korisnik ili se pojave neplanirani ili nedovoljno planirani izdaci, sredstava za njihovo finansiranje osigurati će se iz Tekuće budžetske rezerve ili kroz Izmjene i dopune Budžeta.

Ako se u toku godine na osnovu zakona i drugih propisa umani djelokrug ili nadležnost korisnika Budžeta, ili se korisnik ukine, neutrošena sredstva Budžeta za njegove troškove prenose se u Tekuću rezervu Budžeta ili na korisnika koji preuzima njegove poslove.

Predlagač izmjena (proširenja ili smanjenja nadležnosti - djelokruga, reorganizacije postojećeg, kao i ukidanja ili osnivanja novog korisnika) predložiti će Općinskom vijeću i način finansiranja.

### **V - FINANSIJSKO IZVJEŠTAVANJE**

#### **Član 22.**

Općinski načelnik putem Službe za budžet i finansije vrši tekuću kontrolu zakonitosti utroška sredstava po korisnicima, visini i namjenama i obavezno tromjesečno podnosi izvještaj o izvršenju Budžeta Ministarstvu finansija Kantona Sarajevo.

Općinski načelnik, putem Službe za budžet i finansije, sačinjava šestomjesečni i godišnji izvještaj o utrošku sredstava planiranih Budžetom (po korisnicima i namjenama) i dostavlja ih Općinskom vijeću na razmatranje i usvajanje u rokovima predviđenim Zakonom o proračunima - budžetima u Federaciji BiH.

Općinski načelnik, putem Službe za budžet i finansije sačinjava i dostavlja Općinskom vijeću informaciju o utrošku Budžetom planiranih sredstava za period januar - mart i januar - septembar tekuće godine radi upoznavanja.

### **VI - NADZOR I REVIZIJA BUDŽETA**

#### **Član 23.**

Reviziju Budžeta vrši Ured za reviziju budžeta - proračuna u Federaciji BiH u skladu sa zakonom.

Nadzor nad korištenjem budžetskih sredstava obavlja budžetska inspekcija Ministarstva finansija Kantona Sarajevo putem ovlaštenih službenika Ministarstva finansija.

### **VII - JAVNOST I TRANSPARENTNOST BUDŽETA**

#### **Član 24.**

U cilju obavještanja javnosti o upravljanju javnim prihodima Izvještaji o izvršenju budžeta koji se podnose Općinskom Vijeću na usvajanje, objavljivati će se u "Službenim novinama Kantona Sarajevo" i na WEB stranici Općine Vogošća.

Budžet i Odluka o izvršavanju budžeta, kao i svaka izmjena i dopuna budžeta objavljivati će se u "Službenim novinama Kantona Sarajevo" i na WEB stranici Općine Vogošća.



## VIII - PRIJELAZNE I ZAVRŠNE ODREDBE

### Član 25.

Platni promet vršit će se putem depozitnog računa i transakcijskog računa kao i transakcijskih podračuna za prikupljanje namjenskih sredstava, otvorenih kod finansijskih institucija (banaka).

Obavljanje usluga platnog prometa vršiće se na osnovu sklopljenih Ugovora. Potpisnici naloga platnih transakcija su ovlaštena lica čiji su potpisi deponovani kod poslovnih banaka.

### Član 26.

Na pitanja koja nisu regulisana ovom Odlukom primjenjivat će se odredbe Zakona o budžetima u Federaciji BiH ("Službene novine Federacije BiH", broj: 102/13, 9/14, 13/14, 8/15, 91/15, 102/15, 104/16, 5/18, 11/19, 99/19 i 25a/22).

### Član 27.

Ova Odluka stupa na snagu narednog dana od dana objavljivanja u "Službenim novinama Kantona Sarajevo", a primjenjuje se za fiskalnu 2024. godinu.

Broj:01-02-2245/23  
Vogošća, 28.12.2023. godine



